

乾隆四明圖經

四明圖經目錄

卷一

總敘

分野

風俗

城池

子城

祠廟

水利

古跡  
州城內

賢守事實

卷二

鄞縣

鄉里村  
附

御書

橋梁

渠堰

祠廟

附 祠堂

山

水

江湖河潭附  
按曰河潭闕

○

人物

附 名僧

古跡

冢墓

縣宰題名

卷三

奉化縣

賢宰

人物

卷四

定海縣

卷五

慈溪縣

賢宰

人物

逸民

冢墓

卷六

象山縣

祠廟

山

卷七

昌國縣

鹽場

祠廟

山

水湖潭  
井

古跡

卷八

古賦

古詩

律詩

絕句

長短句

卷九

記

卷十

記

卷十一

碑文

銘

贊

傳

書

卷十二

太守題名記

進士題名記

四明圖經目錄

四明圖經卷一

宋元四明  
六志第一

宋

張

津

等

撰

總敘

上明州奉化郡奉國軍節度

治鄞縣

本屬會稽古舜居後

爲餘姚之墟初夏禹會諸侯於江南執玉帛者萬國上  
苗山大會計爵有德封有功因而更名苗山曰會稽周  
禮東南曰揚州又曰揚州之鎮山曰會稽明乃會稽之  
東境自勾踐滅吳稱霸其後越爲楚所滅子孫散於會  
稽甌閩之間分有故越之地秦并百粵罷侯置守分天  
下爲三十六郡曰會稽羗者兼吳越而通稱也漢興封



劉賈爲荆王賈爲英布所殺遂以劉濞爲吳王景帝四年濞反誅國除乃復爲郡治於吳又嘗封閩越王之子搖爲東甌王元鼎五年東甌國除因以其地并屬會稽而立東部都尉治鄞其後徙章安章安今奉化之南也成帝陽朔元年又徙治鄞或有寇盜又徙句章王莽改鄞爲謹順帝永建四年劉府君上書浙江之北爲吳郡其會稽郡領山陰會稽鄞烏傷諸暨太末上虞剡餘姚句章鄞章安永寧東侯官十四縣吳郡會稽於是始分而鄞鄞句章三縣皆會稽之東部卽今明之地也故自兩漢而明越皆爲會稽郡魏晉以來叢有變更隨平陳

廢鄞以地隸吳州總管府高祖武德四年始析句章縣  
爲鄞州八年廢鄞州爲鄞縣隸越州明皇開元二十六  
年採訪使齊澣始復奏請爲州以境內有四明山故號  
州爲明而郡名奉化屬浙東觀察使首命秦舜昌爲刺  
史天寶元年改爲餘姚郡肅宗乾元元年秋七月復爲  
明州仍兼浙東觀察使舊治鄞縣今阿育王山之西鄞  
山之東城郭遺址猶存代宗大厯六年三月海寇袁晁  
作亂於翁山而鄞久弗能復乃移治鄞鄞東取鄞城財  
三十里領縣五日鄞曰奉化曰慈溪曰象山

象山本屬  
台州神龍

元年始

曰翁山是年翁山縣廢穆宗長慶元年浙東觀

來屬

察使薛戎上書明州北臨鄞江地形卑隘請移郡於鄞  
縣置其元郡城近南高處卻安縣從之而移否莫得而  
知昭宗乾寧二年錢鏐爲鎮東軍節度使五代朱梁嘗  
爲望海軍開平三年分鄞縣置定海縣厥後錢元瓘自  
號爲吳越王據有兩浙十三州之地漢乾祐二年吳越  
王錢俶命其弟億判四明聖宋受命建隆二年陞爲奉  
國軍復授億節鉞以鎮之億爲節度十有八年至乾德  
五年終于任猶子惟治實襲其後太平興國二年吳越  
王納土歸闕籍十有三州而明居其一朝廷改授惟治  
鎮海軍節度使自是始用文臣爲太守熙寧六年奉勅

割鄞縣之邊海富都等三鄉勅立昌國縣元豐元年又撥定海縣金塘一鄉隸昌國故今縣有六鄞奉化定海慈溪象山昌國六縣風土物產古今人物寺觀祠宇亭傳場鎮江湖河堰地靈古跡隨縣開列於後以傳不朽

### 分野

按後漢志自斗六度至須女四度謂之星紀之次越之分野故虞翻曰會稽上應牽牛之宿下當少陽之位東漸巨海西通五湖南暢無垠北渚浙江明之爲州實越之東部觀輿地圖則僻在一隅雖非都會乃海道輻湊之地故南則閩廣東則倭人北則高句麗商

船往來物貨豐衍東出定海有蛟門虎蹲天設之險亦東南之要會也

風俗

按隋書江南之俗火耕水耨食魚與稻以漁獵爲業雖無蓄積之資然亦無飢餒之患信鬼神好淫祀小人多商販君子資官祿市廛列肆埒於二京人雜五方故俗頗相類京口東通天會南接江湖西連都邑亦一都會也其人本習戰號爲天下精兵俗以五月五日爲鬪力之戲各料強弱相敵事類講武會稽邵亦然川澤沃衍有海陸之饒珍異所聚故蕃漢商賈並

奏君子尙禮庸庶敦龐故風俗澄清而道教隆洽蓋其風氣所尙也

城池

明之羅城舊云閩粵無諸所築夏侯曾先謂劉牢之築以塞三江之口西城外有城基上生竹篠俗曰篠牆卽故基也今羅城周回二千五百二十七丈計十八里西與南則環以水東與北則繞以江晉末孫恩海寇也其犯會稽則由上虞以入不由乎明州者亦以此城據三江之險云

子城

子城周圍四百二十丈環以水麗譙揭奉國軍之額太守潘良貴書州樓揭明州之額舊錢氏書今潘良貴書州治以奉化縣之企峨山爲外案山而以城中之鎮明嶺爲內案山後坐慈溪縣之驃騎山山以張驃騎而得名蓋後漢時人也奉國軍樓中有刻漏皇朝慶曆年太守王周重修是時王文公安石爲鄞宰嘗銘之其後歲久差舛不可信紹興辛巳太守韓公仲通請得吳人祝岷考古制冶銅爲蓮漏至今用之有記刻于石發州許克昌文也

祠廟三

靈應廟卽鮑郎祠也舊云永泰王廟在州南二里半按  
輿地志云鮑郎名蓋後漢鄆邑人爲縣吏縣嘗俾捧  
牒入京畱家酣飲踰月不行縣方詰責已而得報章  
果上達審究實然旣死葬三十年忽夢謂妻曰吾當  
更生盍開吾冢妻疑不信再夢如初乃發棺其尸儼  
然如生第無氣息耳冥器完潔若日用者冢之四旁  
燈然不滅膏亦不銷郡人聚觀咸怪神之立祠以祀  
梁大通間有奴賊名益誕唱誘羣盜有衆三千號奴  
抄兵寇會稽永嘉臨海海鹽並海郡邑咸被其害官  
軍屢邀擊不勝賊勢益張定襄侯蕭祇爲刺史神忽



見形因巫語祇願助討賊祇乃施帷帳迎神置于譙  
門形雖隱而言與人接越三日告去語祇曰當以八  
月十三日破賊奴抄果以是日至餘姚舟膠於江衆  
陷於淖潰潰如醉官軍悉繫縛之若拾遺然祇奏其  
異武帝遣增大祠字日以益盛唐聖厯二年縣令柳  
惠古徙祠于縣會昌中刺史張次宗嘗撰記皇朝崇  
寧二年尙書豐稷奏明州鮑君永泰王廟額犯哲宗  
皇帝陵名乞改額內永泰二字爲靈應勅如其請政  
和八年太守徽猷閣待制樓昇以兩陽順時有禱輒  
應奏請王爵加惠濟王宣和四年太守直龍圖閣李

友聞因睦寇竊發驚擾鄰邦本州終獲保全繫王之  
功奏請加封於是加威烈二字又至六年侍郎路允  
迪使高麗舟舩安濟奏請再加忠嘉二字建炎四年  
車駕巡幸奉勅加廣靈二字今稱靈應忠嘉威烈惠  
濟廣靈王

純孝廟東漢孝子董君祠也在州東南五十五步唐大  
曆十二年立刺史崔殷爲之記徐浩書君名黯其孝  
行之大已見于徐浩所書之碑今祠宇卽其故宅先  
是其母塑像在南郭外草堂中康憲錢公億因訪問  
而知之迺迎歸孝子廟以伸崇奉且具其事實請于

朝乞加廟額於是勅封爲純德徵君之廟也徐浩所  
書碑蓋郡中之寶也今舊石不存獨簽判韓嘉重刊  
石在廟中耳

伏飛廟在州北一里二百步鹽倉之西昔有碑今亡故  
神之姓氏邑里無傳焉淮南子云荆有佞非得寶劍  
於千隊還及渡江中流暴風揚波兩蛟夾繞其舟佞  
非謂樞密者曰嘗有如此者而得活乎曰未嘗見也  
於是佞非臨日勃然攘臂拔劍曰武士可以仁義說  
在不可劫而奪之此江中之鱗肉朽骨棄劍而已余  
又安愛焉遂江刺蛟遂斷其頭舟中人盡活風波畢

除荆爵爲執圭孔子聞之曰夫善戰腐肉朽骨棄劍者飲非之謂乎按皇朝建隆中鄆令金翊篡異記謂唐武德時以此郡爲鄆州至開元中改鄆爲明郡名奉化城而東地名句章軍號飲飛考此則飲飛廟者蓋出于當時之軍號而軍必有將之者往往有功於人故人爲之祠云大觀之初本州所編九域志乃引淮南子所謂荆有飲飛不知淮南子之非實非是之非非飛走之飛今廟新榜遂稱荆飲飛侯豈非好事者附會其說而增以荆字歟

水利

城之河渠蓋一水自宅山經仲夏而入南門一水自大雷經廣德湖而入西門淫潦汎溢則城之東北隅有碶以洩於江碶闕猶存二水入城爲州民之利今猶昔也皇朝天禧開許僉作李侯夷庚開河記言廣德湖水也元祐開舒公龍圖壘爲西湖引水記言宅山之水也其後儉正王公庭秀作河渠說則兼言二水之利開河記曰廣德湖者舊爲官職田之所廢穿百三十穴盜洩四注中不涵儲耨之爲畎畝之地蹂之爲芻牧之場公於是口官占民侵之所及芻牧之所踐者盡命撤廢禁不得人亘之以巨防環之以長堤

築捍堅固導洩有方均之以高下周之以遠近自郭之內家映修渠人酌清泚混混之流周環四來潤下不竭澄源有歸又引之於州北隅鑿兩池以淳之雖炎曦下爍河流交絕而茲池不可涸也引水記曰鄆縣南二里有小湖唐正觀中令王君照修也蓋今里俗所謂細湖頭者乃其故處焉湖廢久矣獨其西隅尙存今所謂西湖是矣明爲州瀕海枕江水難蓄而善泄歲小旱則池井皆竭而是湖所以引它山之水爲旱歲備也

州城內古跡七

郡之子城內亭宇中舊有唐刺史王密德政碑李舟文  
顏真卿書李陽冰玉筯篆額遭建炎兵火石已斷缺  
不全今在郡樓之下此碑與董孝廟徐浩舊碑皆是  
郡所寶也

州宅進思堂之西壁外有唐柳公權書金剛經刻于石  
而龕之

蛟池在州之北故老云嘗有蛟自江來窟於此人患之  
故其旁立飲飛廟以鎮之池今爲居民所侵堙塞無  
幾矣

鎮明嶺在州南一里三十步州之內案山也上有佛亭

皇朝天禧中太守李夷庚能地理之學以州無案山故直州之南累土爲阜高丈名曰鎮明嶺此蓋夷庚因其舊有而增之耳非扞爲也其後往來憚於登陟日削月夷特餘土坡於其側耳

競渡湖卽開元寺西之小湖也昔有黃鍾二公競渡於此故後人以名其處亦呼爲小江里又曰沿江里也清瀾池在州衙前直奉國軍之門錢恭惠王在鎮日嘗浚之以爲禦火備太守李夷庚復浚之以其泥益鎮明嶺之卑薄壯內案山之勢池與州學泮水池春閒蛙不鳴俗傳以爲李侯夷庚以法禁之也



西湖在州南六十步舒公龍圖直嘗記其事以爲是湖  
本末圖誌所不載其經始之人與歲月皆莫得而考  
湖中有汀洲島嶼凡十曰柳汀曰雪汀曰芳草洲曰  
芙蓉洲曰菊花洲日月島曰松島曰花嶼曰竹嶼曰  
煙嶼四時之景不同而士女遊賞特盛於春夏飛蓋  
成陰畫舫漾影無虛日也

賢守事實十二

唐開元二十六年齊澣旣請置明州更爲潤州刺史招  
集流民五百戶置此以安輯之

正元九年刺史任侗修治廣德湖溉田四百頃

太和六年刺史于季友築仲夏堰溉田千頃

長慶三年刺史應彪建跨江浮橋五十五丈

元稹爲浙東觀察使明州舊貢蚶走驛達于長安郵卒  
不勝其疲稹奏罷之

孔戣爲刺史後遷國子祭酒見明州貢蚶蛤淡菜水陸  
勞費特奏罷之

王密爲刺史德政可紀李舟爲之記事見於碑刻

皇朝建隆開廣德湖湮塞康憲錢公億請于朝用工濬  
治築爲塘岸周回一萬二千八百七十一丈宅山堰  
損苦不可修公跪請于神復得存固

天禧中直館李夷庚爲太守修治東湖與廣德湖水利  
通濟有功於民

政和間太守樓異明人也被命再任繼而睦寇猖獗蹂  
踐鄆郡公備禦有方六邑無犯

紹興八年太守仇公忞當兵火之餘復首建州學與鄉  
士大夫行鄉飲酒之禮邠人乃立祠于學

乾道五年太守直閣張公津憫鄉飲酒之禮久廢乃以  
正月二日率僚僚與邠之士大夫及士人之客寄是  
邠昔卽州庠行饗菜之儀盡致敬之義然後序齒會  
拜於講堂三爵而退自此遂爲常規云由是邠人復

共立祠於學焉

凡稱劉本劉藝  
蘭鳳章家所藏

子城

皇朝慶厯年

劉本年上  
有八字

祠靈應廟

又至六年

劉本無又  
至二字

飲飛廟

城甬東

劉本城下有名字據寶慶  
延祐盧浦筆記是號字

水利城之河渠

二水入城

劉本水下  
有之字

四明圖經卷一

鄞 徐時棟校刊

國朝圖經卷二

宋元四明  
六志弟二

宋

張

津

等

撰

鄞縣

望鄞縣古越地之東境國語曰吳更封越東至於鄞秦  
平百粵以其地置鄞縣屬會稽郡吳越春秋謂越有赤  
堇山故加邑爲鄞漢武帝元鼎五年會稽東部都尉治  
鄞其後徙章安帝陽朔元年又徙治鄞王莽改曰謹  
後漢改爲鄞縣居鄞山之陰既而復爲鄞縣晉太康中  
戶一千六百六十隋平陳縣廢并其地入句章縣屬吳  
門總管唐武德四年復分置更名鄞縣

蓋古句章鄞鄞  
三縣之地故其

煙嶼樓校本

後或有鄞屬鄞州八年州廢還屬越州開元二十六年  
或有鄞也又爲鄞縣於縣置明州元和中定爲上縣皇朝爲望縣  
元十八鄉淳化元年分萬齡爲二鄉曰老界曰手界熙  
寧中割六鄉靈巖太丘海晏富都安期蓬萊隸定海昌  
國今十三鄉

鄉里村附

十三鄉管里十三村二十

武康鄉

東安鄉

清道鄉

萬齡老界鄉

萬齡手界鄉

光同鄉

桃源鄉

鄞塘鄉

陽堂鄉

翔鳳鄉

豐樂鄉

通遠鄉

句章鄉

武康鄉在州城下管小江里

東安鄉在州城下管白壇里

清道鄉在縣西一里半管里一村二

橫山里

高橋村在縣西二十里

沈店村在縣南七里

乾道二



萬齡老界鄉在縣東五里管里一村二

赤城里

盛店村在縣東一十五里

尙書村在縣東一十里

萬齡手界鄉在縣東南一十里管里一村二

赤城里

張村在縣東南二十里

鄧橋村在縣東南四十里

光同鄉在縣南一十里管里一村二

清林里

北渡村在縣南二十五里

櫟社村在縣南二十里

桃源鄉在縣西二十里管里一村二

石馬里

黃公林村在縣西三十里

林村在縣西四十里

郭塘鄉在縣南二十五里管里一村二

姜山里

姜山村在縣南三十里

銅盆浦村在縣南二十五里

陽堂鄉在縣東三十五里管里一村二

太白里

寶幢村在縣東三十里

東吳村在縣東三十三里

翔鳳鄉在縣東南四十里管里一村一

滄門里

隱學村在縣東南四十五里

豐樂鄉在縣東南四十里管里一村二

石柱里

乾坑村在縣南四十二里

故干村在縣南四十五里

通遠鄉在縣西南六十里管里一村一

李洪里

環村在縣西南五十五里

村名舊犯欽宗廟諱故改

句章鄉在縣南六十里管里一村二

夕陽里

高橋村在縣西南五十五里

市中村在縣西南六十里

御書四

阿育王山廣利寺在縣東三十五里晉義熙元年建皇

朝大覺禪師懷璉居之法席鼎盛名聞天下皇祐二年懷璉入居東京淨因禪院仁宗皇帝召對化成殿因賜食禁中及授以御製釋典頌十四篇并提綱語句治平三年英宗皇帝內降劄子許歸木寺熙寧三年迺建寢奎閣奉藏所賜御書且被旨歲度僧一人寺有釋迦如來眞身舍利塔內有一角金鐘舍利在焉寺之東北峯上有佛左足跡距寺一二里輪相分明今爲石宇以覆之傳者謂迦葉佛之跡也寺有東塔院相去二里卽劉薩訶所禮舍利塔湧出之處西塔院去寺五十步其塔唐明皇時建也

聖功院本崇教院也周顯德元年建在縣西南四里半  
皇朝至道元年眞宗皇帝詔內侍裴愈訪名山聖跡  
寺院茶藏太宗皇帝石刻御書於是本院奉賜五十  
卷軸明年因愈奏改賜今額

大中祥符寺在縣南一里半皇朝僧三惠大師從信得  
業之地也信妙於琴阮端拱中至京師求知已會有  
上言于太宗皇帝者召見與語奏技盡其所學上大  
悅命入翰林祇候賜食禁中資錢帛無算一日求歸  
特兪其請行且賜以師號及御書御批等信迺奉  
藏於寺也內有教院輪藏在焉

政和七年太守樓異乞置高麗司徽宗皇帝有御筆批諭刻之於石其碑在西湖錦照堂

橋梁

鄞江跨江浮橋在縣東南二里舊曰靈現橋亦曰靈建橋唐長慶三年刺史應彪建太和三年刺史李文孺重建初建橋於東渡門三江口江闊水駛不克成乃徙今建橋之地經始橋基雲中微有形彎環如虹衆以爲異因建橋於其下皇朝開寶中康憲公錢億復新之舊有范的所撰碑後沈於江而尚書謹溫其所作碑亦不存也乾道四年太守直閣張公津重修今

名東津橋其長五十有五丈其闊一丈有四尺云

渠堰二

它山堰在縣西南五十里唐開元間邑宰王元暉之所  
建也累石爲隄江河分流截然爲二若神工然明之  
爲州瀕海枕江水善泄而易竭雨澤少屯井泉輒涸  
酌飲江水人以爲病引它山之水自南門入城瀦爲  
西湖闔境取給始無旱暵之憂它山堰之爲利溥矣  
餘載祠廟門

仲夏堰在縣西南四十里唐太和元年刺史于季友於  
四明山下開鑿河渠引山水流入諸港置堰蓄之漑



田數千頃

祠廟十二 祠堂附

至聖文宣王廟在縣東半里唐元和九年建皇朝崇寧二年因行三舍法教養生員移於縣西南半里而成於大觀之三年建炎四年遭兵火至今未建也

東獄行宮在縣東三十二里育王山相近

忠嘉威烈惠濟廣靈王行廟在城外甬東隅五里

它山堰善政侯廟在縣西南四十里以廟碑考之蓋唐太和中邑宰琅琊王侯諱元暉之祠也先是厥土連江厥田宜稻每風濤作沴或水旱成災侯乃命採石

於山爲堤爲防迴流於川以灌以溉通乎潤下之澤  
建乎不拔之基能於歲時大獲民利自它山堰溉良  
田者凡數千頃故鄉民德之立祠以祀後封爲善政  
侯皇朝乾道四年七月八日有旨賜遺德廟額知縣  
事揚布書太守直閣張公津之所立也

逸老堂在西湖上衆樂亭相對爲唐祕書監賀公知章  
季真而作也而祠堂在其西皇朝紹興十四年八月  
太守莫公將建乾道五年四月太守直祕閣張公津  
重修

皇朝故丞相魯國會宣靖公公亮祠堂在縣南三里半

延慶寺按天聖中楚國公會會守明州丞相方毓德  
侍下一日遊延慶而主僧法智大師知禮夜夢伽藍  
神告之曰翌日相公來可恭迓之知禮異其事戒闍  
人以來者告已而魯國公至禮以夢告魯公曰烏有  
是哉然默記於方寸至大拜而以知禮之夢爲然於  
是請於朝置田闢舍大啟法席延慶之名始播於天  
下寺僧圖其像而祠之碑碣具存

鬼谷先生祠在縣之東六十里太白山其祠倚山臨水  
幽深闕寂人跡罕到眞仙游所宅也夏侯曾先地志  
云鬼谷子廟三面連山前有清溪之水泉源不竭山

崖重疊雲霧蔽虧晉郭璞曾到有游山詩曰清溪千  
餘仞中有一道士雲生梁棟閒風吹窗牖裏借問此  
阿誰云是鬼谷子卽此祠也

阿育王山淵靈廟在廣利寺鰓井在其東相去里餘世  
謂之聖井自東晉時已著靈異其中二大鰓乃護塔  
神也其一有金線自腦達於尾其一每現光耀折花  
引之則雙紅蟹或二蝦前導而後出焉錢武肅王以  
歲旱命九華長老十善大德與國中所謂五叔太尉  
者同迎歸錢塘之南埭寺山閒鑿石爲井立亭其上  
以倣聖井用仲禮敬而阿育王寺僧時見復在鄞山

井中游泳也山有七井前有亭榜曰應現或云又有  
二井則在山之絕頂峻險不可得而至然亦未知其  
果否也康憲錢公嘗因旱齋沐禱請靈鯁以紫羅爲  
帕若罽狀布井中啟視竟蟹先入罽靈鯁隨後以銀  
缸貯沙泉養之置道場中命僧爲法事復有天花散  
綬之瑞曾統贊宣嘗著護瑜靈鯁菩薩傳皇朝屢因  
旱嘆祈求感應元祐元年奉勅賜額乾道二年太守  
趙公伯圭禱雨有應知鄞縣事李柄作記刻於石

皇朝故丞相荆國王文公安石祠堂二所一在縣之經  
綸閣一在縣東育王山廣利寺按寺中祠堂記云介

甫之爲鄞也勸農務業區別善惡習俗丕變鄉民父老思之願立生祠圖像以順鄞人之心焉蓋嘉祐六年郡守錢公輔立從事胡宗愈之文也

皇朝故內翰蘇公軾祠堂亦在廣利寺內佛殿之右乾道中住持僧從廓重建

李陸二公祠堂在縣東南四十里青山下皇朝天禧中郡守李俟夷庚唐開元中縣令陸南金之祠也李俟又有祠堂在天童山景德禪寺千佛閣之東

黃公廟在縣東近海昌國縣交界卽四皓之黃公也見

會稽典錄

山十六 按曰原有脫落今所校補見佚文卷中

四明山在縣西南六十里孫綽天台山賦云登陸則有四明天台今按此山有四面各產異木而皆不雜又山頂有池池中有三層石臺石樓一名石柱云是四明山纜風處陸龜蒙云有峯最高四穴在峯上每天地澄霽望之如戶牖相傳謂之石窗卽四明之目也事備四明山記山有黃頷蛇長一二尺色如黃金居石縫中天欲雨作牛吼聲中人亦死王蜀時許寂少年棲於山學易於晉徵君一旦有夫婦詣山挈一壺酒寂詰之云今日離剡縣寂曰道路甚遙安得一日

及此頗亦異之其夕以壺觴命酌此丈夫出一拍板  
抗聲高歌悉是說劍之意俄自臂閒抽兩物展而喝  
之卽兩劍躍起在寂頭上盤旋交擊寂甚駭尋匣之  
飲畢就寢追曉乃空榻也出北夢瑣言

鄮山在縣東三十六里高二百八十丈東北峯上有佛  
左足跡下瞰阿育王寺按十道四蕃志云以海人持  
貨貿易於此故名而後漢以縣居鄮山之陰乃加邑  
爲鄮雖或以山或以縣取義不同其所以爲鄮則一  
也故在後漢志爲越州鄮縣之境而唐武德中分置  
縣境更名鄮者以此金翊纂異記乃引顧越碑云昔



西國獵人劉薩訶南登稽嶺東踐鄞山卽此山也按  
鄞因赤堇山得名而其山在縣東三十四里吳越春  
秋云有赤堇山故加邑爲鄞則鄞與鄞蓋二山也舊  
記考之未審乃併爲一山故於此詳辨之

甌洲山在縣東四十五里十道四蕃志云甌洲有虞喜  
豕朱屢召不至死葬於此東方朔十洲記云山有不  
死之草赤莖綠葉人死三日以草覆之卽活按吳志  
黃龍二年春正月魏遣將軍衛溫諸葛直將甲士萬  
人浮海求夷洲及甌洲甌洲在海中漢武洞穴記言  
秦始皇遣方士徐福將童男童女數千人入海求蓬

萊神仙及仙藥止此洲不還世相承有數萬家其上  
人民時有至會稽貨布會稽東縣人海行亦有遭風  
飄至賣洲者所在絕遠卒不可得至故衛溫等但得  
夷洲數千人還今謂賣洲山去縣四十五里尙可疑  
焉世傳今日本國卽此洲然未知是否也

水四 江湖潭附

江在縣東一里實海口也而有大決小決之名蓋隨地  
而異也乘潮往來南入於奉化界東入於定海昌國  
西入慈溪

廣德湖在縣西十二里舊名鴛脰湖唐大厯八年縣令

儲仙舟加修治之功而更以今名正元元年刺史任  
侗又治而大之湖中有若樓閣狀者不常隱現也皇  
朝建隆閒康憲錢公億爲守之初欲展拓波瀾迺託  
情篇什累達宸聽而復奏乞於諸縣農隙集鄉夫萬  
人爲十隊以官吏分董開鑿之役當時嘗給米九千  
碩錢五十萬公復出金千緡以相其費周迴凡萬有  
二千八百七十一丈驕陽鑠石無旱暵之患淳化中  
禁民敢田者至其後遂著之於一州勅大中祥符年  
蘇耆爲守以湖壞漏不補復而浚之湖之興已數百  
年而民之請爲田危於廢者屢矣至政和七年知州

事樓異奏請奉御筆開墾爲田今歲收其米以給甬東所屯之水軍焉

小江湖在縣南二十里唐正觀十年縣令王君照修建溉田八百餘頃

東錢湖在縣東三十里周迴八十里溉田八百頃夏侯曾先地志云其湖承錢球水故號錢湖唐天寶三年縣令陸南金開廣之皇朝天禧元年裨守李夷庚重修是湖受七十二溪之水凡有七堰錢堰大堰莫枝堰高湫堰栗木塘堰平湖堰梅湖堰縣之東七鄉不病旱者湖之力也湖之中一山突然水四環之不與

陸接有庵曰二靈蓋以山而名之也熙寧閒左正言  
陳禾字秀實築以讀書其中以延僧知和居之知和  
有道釋子也每有虎相隨當時名播江浙叢林衲子  
雲集由是法席鼎盛向經兵火焚蕩一空紹興中浮  
屠相與出力復新屋宇丞相史公浩勸廣德張王廟  
像在廊廡下前有國初韶師所築故塼基近已重建  
塼於其上庵有塼銘詳言其事凡四方名人勝士往  
來其閒莫不以爲東南之佳地也

人物十六 名僧三附

任奔句章人文章之士也嘗爲御史中丞出會稽典錄

梁宏嘗爲句章主簿與鄭雲俱敦終始之義見會稽典錄

虞敍處士厚友于之義弟犯公憲乃乞代焉出會稽典錄

董孝子黯縣人也事詳祠廟門

徐浩唐乾元二年嘗進廣孝經十卷授校書郎非徐季海也

周師厚字敦夫邑人也皇祐五年及進士第歷荆湖北路農田水利差役事時朝廷方議役書本路特紛更未定且有欲爲撈甲法者師厚具論四方風俗盜賊

婚田獄訟簿書繁簡之所不同則役有勞逸輕重宜亦不可以一朝廷以爲是下其說行之辰沅兩州初復版圖縣官念所以備邊且欲歲發常平粟師厚謂溪獠嘯聚無常而常平之入有限不可繼宜乘事始擇曠土使戍卒且耕以守亦古法也天子然其策至今以爲利

俞充字公達邑人也中嘉祐四年進士第官至右正言天章閣待制環慶路經畧安撫使環州有田與夏國相錯歲種爲虜所掠未有敢詰者由是委而荒之充至徽州所部以時耕種卒不敢犯屬羌山夷嘯聚叛

充授第二將張守約以籌算且招且討有亡入夏國者三百戶充又遣守約耀兵塞上夏人亟歸亡者充釋其脇從老弱以奏不浹旬遂獲安妥手詔褒焉沿邊屬羗乏馬充條上勸賞買馬之法朝廷可其奏下諸路行之未久屬羗樂於畜養大增戰馬之利慶陽兵素玩恩稍繩治往往震搖充至嚴約束斬五妄言者於和門軍始肅然卒之夕大星隕於寢堂之北有奏議五卷邊說二卷藏於家

豐稷字相之邑人也弱冠登嘉祐四年進士第歷襄州穀城令韓持國維曾子固輩相繼守襄奇之薦於朝



是時兵部侍郎葉康直方爲光化令亦有能名韓公  
嘗曰豐葉二令它日必皆清近襄陽人歌之曰葉光  
化豐穀城清如水平如衡以選知封丘縣大臣薦其  
清修儉直宜爲御史乃除監察御史裏行爲御史三  
歲憚劾不避權要神宗嘗謂臺諫曰惟豐稷論事最  
誠實後自成都府路提刑召爲工部外郎復以薦拜  
殿中侍御史改國子司業除起居舍人權中書舍人  
遷太常少卿國子祭酒兼侍講刑部侍郎以集賢院  
學士知潁州自潁遷待制移知廣州過關入覲畱拜  
吏部侍郎丐出累典大藩召拜諫議中丞工部尙書

賁降敍復提舉亳州太清宮以薨被遇三朝出入數  
十年終始一節清德重望達於天下性嗜學逮老不  
衰素恬靜寡言語平居危坐終日不跛倚常若對大  
賓雖見卒隸必正衣冠無倨情容迫復樞密直學士  
諡曰清敏

袁穀字容直世爲明人一程文于開封兩試于鄉皆第  
一嘉祐六年中進士第歷任至知興化軍累官至朝  
奉大夫而以文名天下其爲人磊落明白推誠自信  
急人之所不足著文集七十卷藏於家纂通題九十  
卷韻類一百卷行於世

姚萼字舜徒縣人也以字行幼開爽穎悟學如宿植登熙寧九年進士第歷尉掾以考第薦章應格改秩爲鼎之桃源宰承虐政後訊民之疾苦苟利於民無不爲也郡將武人怙威凌僚吏屬邑苦其擾萼毅然以民病告郡將終不敢以氣餒挫之爲之少戢旁郡訟訴有不得其平者必丐於部使者付萼決之捐金修夫子廟躬率士子日勸以學學者翕然歸之鄉有虎孳禱諸社諭以文越三日虎仆於社旁奏課爲天下第一部使者舉萼學行優異才能顯著以應元符之詔賜對稱旨乃除提舉成都府路常平等事陞辭玉

音諭以聞卿久任桃源有愛民之心孳退謁丞相諭  
蜀道利疚乞以義倉之儲置吏立法收養鰥寡老疾  
死給衣衾官爲殮瘞歲薦饑閒有遺兒請屋嫗以乳  
丞相上之丁家艱服除提舉湖南常平等事上復諭  
以居養安濟漏澤朕施實德於民卿向有言故復命  
卿易使浙部過家上冢會閭里耆舊握手盡歡未始  
以持節自榮朝廷遣使三韓渡曹娥江非潮時舟膠  
公適董其事禱於神女潮應禱而邁由江東副漕除  
直龍圖閣知夔州興學校勸農桑有古循吏風卒之  
日夔民罷市聚哭于牙門訃聞桃源民乃卽孳生祠

一 卓 文 二  
二  
爭出資命道德士以伸薦導其爲民所思如此

陳禾字秀實邑人也元祐初試國子監擢第一自是課  
試上庠累居前列聲名籍甚中元符三年進士甲科  
初調鄆州司法直死囚之冤部使者列薦於朝除濰  
州州學教授以經術之學講明開悟後進從者翕然  
大變其俗後由葵州教授入爲太學正遷辟雁博士  
徽宗聞其才召對甚喜特旨改秩擢監察御史未幾  
遷殿院隨事獻言補益爲多上愈嘉其忠直命爲左  
正言專以言責付之由是感激展盡底蘊無所回忌  
因以諫諍聞後坐與忠肅陳公瓘交遊流落江湖著

書立言以垂世有論語孟子易春秋四經解流行侍  
郎高閎抑崇爲之序四明士大夫之解經者自禾始  
其文集藏於家云父謚字康公博學教子有法許將  
榜登第而禾之子曦黃公度榜登第明白國朝以來  
連三世科第者陳氏而已鄉人以爲甚榮也世喜藏  
書謚之亡舒中丞亶作輓章有曰塵埃滿匣空鳴劍  
風雨歸舟只載書曦復爲藏書記以告於後俾勿墜  
素業也

俞偉字仲寬邑人也元祐初爲南劔州之順昌令邑民  
生子多不舉偉乃集耆老諭之以理且伸約束曰孕

者登籍邑人悔悟遵其教再耕而闕其籍欲棄而畱者甚衆率以偉字名之部使者狀其績以聞朝廷嘉之降詔獎諭進秩再任且許出粟以賑其募臥而貧者俸益懇惻宣諭朝廷好生之意數年閒賴以活者萬餘人邑士廖嶢爲立德政碑而魏人黃裳作邑中步雲閣亦紀其政績以循吏許之

陳攄字君益邑人也紹聖間宰南劍之將樂敦崇學校獎進士類政尙愷悌先是邑民家舉一子富室不過二子餘悉棄之攄至諭以天性申以令甲犯者窮治自茲民無不舉子矣男陳其名女陳其氏者皆然也

後卒於官邑人思慕祠而祀之遇旱禱雨輒應以至鄰境淫雨亢陽乞靈祠下咸遂所祈部使者以其有功於民乃請於朝錫旌福廟額

陳之翰處士延平陳忠肅公瓊誌其墓云字憲之邑人也居西湖少有志操治經求大旨爲文不蹈襲時語三上禮部不中因不復應舉歸求其志大觀二年徽宗皇帝詔舉遺逸鄴之賢士大夫聞而相與語曰此可以得憲之矣州及部使者用衆論薦於朝天子官之知公行實而善朝廷之得士者非特鄴之賢士大夫而已也其爲忠肅公所敬服如此



王庭秀字穎彥其家四明者不知始所徙庭秀與蘇子瞻程正叔之門人高第黃魯直楊中立之徒游從其爲學旁搜遠紹不苟趨時好其造詣嶄遠操植堅正發於文辭深茂宏達以其緒餘從事科舉政和二一年登上舍第歷樂壽尉泗州隨州教授當路論薦交章溢格改宣教郎李公光遷侍御史與之昧平生一見如舊識卽薦爲御史臺檢法官其在宣和靖康建炎間進言於朝皆發於忠義自察院遷殿中而振臺綱屢丐祠優詔止之後因對漉懶得知筠州召爲吏部外郎擢左司郎官遷檢正與宰相議多齟齬引疾丐

聞除直祕閣主管江州太平觀歸老於鄉長子璧生而穎異不凡七歲日誦千言一過輒不忘以宣和六年丙科登第少年氣銳負才宏碩方勇功名之會悉焚前所爲舉子之文披閱羣籍孜孜弗倦無不淹該左丞葉公夢得參政孫公近議欲列薦出應大科適朝廷方復博學宏詞科首冠其選天不假年用罔究其長而終於一待通判士論嗟惜之

高閔字抑崇唐宰相智周後世家廣陵高祖贊襄始居明閔幼穎悟不凡八歲誦經史通其義或問得時則駕出何書閔曰非史記老子傳乎客驚異之謂其父

欽臣曰此兒當與君門戶弱冠入辟雍繼升太學屢中魁選初課試文格尙對偶閱特變爲古文又先羣彥一時文格遂復元豐元祐之舊以校定最優充舉錄宣和中置講議司領以大臣辟官屬日夕講議天下事太學公試用爲策題閱對爲天下事當令天下人議之時以爲至言建炎初試上舍中優等紹興改元賜進士第釋褐諸公方欲薦引繼丁內外憂服闋執政交章稱閱議論簡正明於治體可以居經筵勸講之地五年春有旨與行在差遣令內殿引見進劄有曰人君不難用臣下之謀猷而難於不忘臣下之

規戒改左承奉郎除正字論薦舉之弊與天下之勢最急者在機會又請止賜新恩進士中庸篇而儒行篇雖閒與聖人意合實出漢儒雜記非聖人格言乞勿賜又請預嚴水戰之備皆蒙聽納後攝禮部外郎因上殿奏事論及和氣上曰朕見士大夫議論以爲輕徭薄賦安民心寬民力可以召和氣問曰臣以爲此召和氣之一事耳而其本乃在人君有以感之心正則氣正氣正則天地之和氣應矣上是其說至言正名分與屯田之利爲尤切久之出奉祠復參東帥謀除國子司業引見奏曰陛下復興太學此帝王盛

德事上曰太學復興欲得學問淵源德行純正者爲  
師表故命卿因言臣在京師見太學辟雍皆有御書  
閣今當依祖宗例建閣以藏御書願時灑宸翰加惠  
多士上許之其任司成論事爲最詳兼權中書起居  
二舍人迺除禮部侍郎以忤秦檜意出爲筠州遂請  
掛冠居鄉每對士大夫唯舉前言往行可師法者未  
嘗及時政得失人物臧否泛觀經史諸子百家而絕  
意榮進不成戚於阨窮享年五十七

僧普交邑之萬齡鄉人畢氏之子也幼穎悟未冠從釋  
初往錢塘南屏山聽天台教觀因修懺悔佛事遇道

人於途忽問曰師之懺罪爲自懺耶爲懺它耶若自懺罪罪性何來若懺它罪它罪非汝烏能懺之交不能對歸語南屏亦不能決遂憤然辭去乃造泐潭泐潭知其爲法器見入門卽訶之擬問則杖之交不能復進一日忽呼曰我有古人公案要與商量何不自室中來交擬進泐潭喝之交豁然有省卽以偈呈曰有人問我解何宗一喝須教兩耳聾滿杓黃齏飽喫了生涯只在鉢盂中自是機辯迅發學徒爭歸之歸隱天童山八年偶寺闕主僧羣僚邀之甚力交不得遁居之宣和六年三月二日沐浴留偈辭衆而逝後

七日開龕如生闍維獲五色舍利交修持清苦履行  
孤潔嗣法者三十餘人皆能傳交之道而闡揚于時  
忠肅陳公瓘嘗贊之曰搆破黃龍第四關世人猶問  
生緣法其爲士大夫推重如此有埵銘中書舍人黃  
公龜年撰

僧法忠縣之萬齡鄉人姚氏之子也母初夢神僧託夢  
于家覺而有孕既生兩足有文若篆書之木字父母  
奇之生不茹葷年七歲依州之崇教院道英和尚出  
家博識強記出乎天性諸部經論默究其義或笑其  
憇而試之以隱奧辯駁淵翻旨趣超卓咸以忠虎子

名之將歷訪諸方有挽而止之者師曰達摩之門真  
吾所行之地子休矣乃參天童交和尚交見而喜曰  
子吾宗之法器也俾往謁雪峯需和尚機緣有契後  
抵舒州龍門佛眼和尚佛眼稱之曰將知它日蓋天  
蓋地老朽之所不及爲吾向後宜藏深山窮谷之中  
久而彌芳也師掩耳而去自是耆德改觀而語句大  
播叢林游南嶽有終焉之志乃卜築于妙高峯下庵  
之左有石如臥牛師榜其居曰牧庵焉述宗教正心  
論十卷補寒山詩三百篇彖談漁父並行於世蓋已  
自利而利它也藩帥節相爭邀致之復往南木雲蓋



公安二聖大瀉黃龍凡六處禪學輻湊奔走如市隨其根器方便接誘最後在黃龍遺囑徒衆并書頌曰六十年遊夢幻中浩歌歸去撒手長空咄跏跌而逝緇俗同聲慘慟龕而葬之寺東之香源洞平日持一木斧以垂接人於是同瘞焉號曰聯光之塢

僧奉真邑人也善醫熙寧中名聞于東都沈存中筆談載其一事云天章閣待制許元爲江淮發運使奏課於京師時欲入對而其子疾亟瞑而不食惛惛欲死逾宿矣使奉真視之曰脾已絕不可治死在明日元曰觀其疾勢固知不可救今方有事須陛對能延數

日之期否奉眞曰若此似可諸臟皆已衰惟肝臟獨過脾爲肝所勝其氣先絕一臟絕則死若急瀉肝氣令肝氣衰則脾少緩可延三日過此無術也乃投之藥至晚遂能張目稍稍復啜粥明日漸蘇而能食元極喜奉眞笑曰此不足喜肝氣暫舒耳無能爲也越三日果卒奉眞之爲醫也其診視之妙不差銖分沈公不妄許可其所錄如此則奉眞殆和緩之流亞歟奉眞號普濟其法傳之元覺元覺傳之法琮及了初皆能續其馥馳聲一時相傳蓋三世活人無慮千百數侍郎高閻嘗跋沈公筆談後亦敘其傳受之大畧

云

古跡七

鄖郭在縣東三十里蓋古鄖縣城也漢爲鄖縣後漢改曰鄖唐武德四年於縣置鄖州八年州廢復爲鄖縣故稱其舊城曰鄖郭卽官奴城也太平寰宇記與舊圖經云漢光武爲賊所敗有奴耕於田而藏之獲免後定天下議賞光武問奴欲何官奴云欲得鄖縣令故俗號鄖縣爲官奴縣又十道四蕃志云宋武微時避吏於此與人奴善奴名桂藏匿旣久爲吏所逼遂適值桂在田以土覆之得免後立官奴城以報之掘

土築城之地名官奴池太平寰宇記以爲光武於史無所據今按宋書孫恩破上虞時劉裕嘗戍句章疑其爲宋武也

古句章城在縣南六十里漢書地理志云渠水東入海山海經云句餘之山無草木多金玉郭璞注以爲山在餘姚南句章北故二縣因以爲名漢武帝元鼎六年東粵王驩餘善反遣橫海將軍韓說出句章道以伐之顏師古曰句章會稽之縣也今句章鄉卽其地也吳錄云句章因山爲名十道四蕃志云在太平山隋開皇九年平陳縣廢

東甌漢嘗封閩越王爲東甌王後漢志永和三年以章安縣東甌鄉爲縣晉太康記云東甌卽鄞縣南之回浦鄉

甬東卽越王遷吳王之地杜預曰句章縣東海外洲是其處又達吳王句甬之東注曰句卽句章甬卽甬東也

古鄞城按太平寰宇記曰本漢縣廢城在今縣南故白杜里有鄞城山

瑞井在縣東三十五里卽淵靈廟靈鰻井也事已詳祠廟門

釋迦如來真身舍利塔在阿育王山廣利寺此八萬四千塔之一也按寺碑云東晉義熙元年以塔之出現肇創茲寺至梁武帝迺賜阿育王額皇朝大中祥符元年真宗皇帝改賜爲廣利寺道宣感通傳云晉太康二年并州離石人劉薩訶生業弋獵因病死而復蘇云在冥中見一梵僧語之曰汝罪深重應墮惡道今洛下齊城丹陽會稽並有古塔及浮江石像悉阿育王所造可勤求禮懺當免斯苦薩訶更生乃祝髮爲僧更名惠達東詣鄧縣入烏石巖結茅以寓徧訪海涘名山忽一夜聞土下鐘聲卽標識其處越三日

見梵僧七人行道空中地形如湧爲方壇狀神光照  
映因斲土求之得一石函中有舍利寶塔六僧騰空  
而去一僧化爲烏石因以名譽焉朱梁正明中吳越  
武肅王嘗迎舍利往錢塘累有光景靈跡尤異後復  
奉以歸寺紹興三年光堯壽聖太上皇帝賜號佛頂  
光明之塔今四明歲有禮塔會遐邇畢集斯爲盛焉  
又按會稽記云晉相王導初渡江有道人神采不凡  
自言來從海上告導曰昔與阿育王同遊鄮縣安眞  
身舍利塔阿育王與眞人捧塔飛行虛空入海諸弟  
子攀引不及一時俱墮化爲烏石如人形名僧傳云

昔有神人捧塏飛行海上弟子中有未得道者墮地  
化爲烏石猶作人形上有袈裟衣至今村名塏墅畧  
名烏石與傳頗異開寶中僧統贊寧作舍利寶塏記  
其載地中湧出寶塏事亦或不同若乃塏之神異備  
載于贊寧之記茲不復詳

冢墓六

忠嘉威烈惠濟廣靈鮑王墳在縣東南三十里  
管公明先生墓在縣西四十里聖女山蓋父老相傳云  
然卽無碑碣可考也

義婦冢卽梁山伯祝英臺同葬之地也在縣西十里接



待院之後有廟存焉舊記謂二人少嘗同學比及三年而山伯初不知英臺之爲女也其樸質如此按十道四蕃志云義婦祝英臺與梁山伯同冢卽其事也陳國冢魏國志鄧山有陳國冢一名鴈棲墓昔爲日南太守死有雙鴈隨柩而歸棲墓上三年然後去

董孝子母墓在縣南城外

鄧女墓在城南崇法院之西北慶厓中荆國公王安石爲鄧令有女曰鄧女死而葬此有墓誌并別鄧女詩見於集中

縣宰題名

建炎四年以前皆不可得而考故斷自王勳而下著之

王勳

左朝奉郎建炎四年到任

徐注

左宣教郎建炎四年到任

張汝說

右文林郎紹興三年到任

顧汝美

左承議郎紹興六年到任

梅執臣

右宣教郎紹興九年到任

張庭

石奉議郎紹興十二年到任

高堯明

右朝散大夫紹興十四年到任

張穎

左奉議郎紹興十七年到任

程緯

右通直郎紹興二十一年到任

王燧

右通直郎紹興二十四年到任

周升亨

右朝奉郎紹興二十五年到任

宋應

左奉議郎紹興二十九年到任酬賞轉朝奉郎

周額

左奉議郎紹興三十一年到任轉右朝散郎

李柄

右承奉郎隆興二年到任

楊布

右奉議郎乾道二年到任

**刊誤**

物人王庭秀

而終於一待通判

盧本寶慶志待下有次字

高開

復參東帥謀盧本寶慶志云浙東帥參謀則此傳東上脫浙字

俞充

屬羌山夷嘯聚叛劉本聚下有爲字

四明圖經卷二

鄞 徐時棟校刊